

四庫全書

集部

欽定四庫全書

御定全唐詩錄卷十七

儲光羲

光羲兗州人登開元進士第又詔中書試文章歷
監察御史祿山反受偽署賊平貶死

顧况序云儲公進士高第與崔國輔員外綦母潛
著作同時其明年擢侍御史常建少府王龍標昌
齡皆當時之秀而侍御聲價隱隱轡轡諸子其文

篇賦論七十卷雖無雲雷之會而意氣相感扶危
急病有賢達之風失身賊廷竟陷危邦士生不融
何以言命然窺其鴻黃窈邃之氣金石管磬之聲
如登瑤臺而進玉府靈篇邃宇景物寥映綠流翠
草嘉禾瑞鳥不足稱珍

殷璠云儲公詩格高調逸趣遠情深削盡常言挾
風騷之迹得浩然之氣

樂城遺言云儲公高處似陶淵明平處似王摩詰

古體詩

野田黃雀行

嘖嘖野田雀不知軀體微
閒穿深叢裏爭食復爭飛
窮老一積舍棗多桑樹稀
無棗猶可食無桑何以衣
蕭條空倉暮相引時來歸
斜路豈不捷渚田豈不肥
水長路且壞惻惻與心違

樵父詞

山北饒朽木山南多枯枝
枯枝作采薪爨室私自知
詰

朝礪斧尋視暮行歌歸先雪隱薜蘿迎暄卧茅茨清澗
日濯足喬林時曝衣終年登險阻不復憂安危蕩漾與
神遊莫知是與非

漁父詞

澤魚好鳴水谿魚好上流漁梁不得意下渚潛垂鈎亂
荇時礙楫新蘆復隱舟靜言念終始安坐看沈浮素髮
隨風揚遠心與雲遊逆浪還極浦信潮下滄洲非為狗
行役所樂在行休

牧童詞

不言牧田遠不道牧陂深所念牛馴擾不亂牧童心圓
笠覆我首長蓑披我襟方將憂暑雨亦以懼寒陰大牛
隱層坂小牛穿近林同類相鼓舞觸物成謳吟取樂須
史間寧問聲與音

采蓮詞

淺渚荷花繁深潭芰葉疎獨往方自得恥邀淇上姝廣
江無術阡大澤絕方隅浪中海童語流下鮫人居春荻

時隱舟新萍復滿湖采采乘日養不思賢與愚

采菱詞

濁水菱葉肥清水菱葉鮮義不遊濁水志士多苦言潮
沒具區藪滌深雲夢田朝隨北風去暮逐南風旋浦口
多漁家相與邀我船飯稻以終日羹蓴將永年方冬水
物窮又欲休山樊盡室相隨從所貴無憂患

射雉詞

曝暄理新翳迎春射鳴雉原田遙一色臯陸曠千里遙

聞呶喔聲時見雙飛起
罽毼踈蒿下
毯毳深麥裏
顧敵乃忘生
爭雄方決死
仁心貴勇義
豈復能傷此
超遙下故墟
迢遞回高峙
大夫昔何苦
取笑歡妻子

猛虎詞

寒亦不憂雪
飢亦不食人
人肉豈不甘
所惡傷明神
太室為我宅
孟門為我鄰
百獸為我膳
五龍為我賓
蒙馬一何威
浮江一以仁
彩章耀朝日
爪牙雄武臣
高雲逐氣浮
厚地隨聲震
君能賈餘勇
日夕長相親

雜詩

混沌本無象末路多是非
達士志寥廓所在能忘機
耕鑿時未至還山聊采薇
虎豹對我蹲鷺鷥傍我飛
仙人空中來謂我勿復歸
格澤為君駕雲霓為君衣
西遊崑崙墟可以世人違

秋氣肅天地太行高
崔嵬猿狖清夜吟其聲
一何哀寂寥掩圭革
夢寐遊蓬萊琪樹遠
亭亭玉堂雲中開
洪崖吹簫管玉女飄飄來
雨師既先後道路無纖埃
鄙哉楚

襄王獨如雲陽臺

效古

晨登涼風臺暮走邯鄲道曜靈何赫烈四野無青草大
軍北集燕天子西居鎬婦人役州縣丁男事征討老幼
相別離哭泣無昏早稼穡既殄絕川澤復枯槁曠哉遠
北憂冥冥商山皓

東風吹大河河水如倒流河洲塵沙起有若黃雲浮蘋
霞燒廣澤洪曜赫高丘野老泣相語無地可蔭休翰林

有客鄉獨負蒼生憂中夜起躑躅思欲獻厥謀君門峻且
深跣足空夷猶

酬綦母校書夢遊耶溪見贈之作

校文在仙掖每有滄洲心況以北窓下夢遊清溪陰春
看湖口漫夜入迴塘深往往纜垂葛出舟望前林山人
松下飯釣客蘆中吟小隱何足貴長年固可尋還車首
東道惠言若黃金以我采薇意傳之天姥岑

使過彈箏峽作

鳥雀知天雪羣飛復羣鳴原田無遺粟日暮滿空城
達士憂世務鄙夫念王程晨過彈箏峽馬足凌兢行雙壁
隱靈曜莫能知晦明皚皚堅冰白漫漫陰雲平始信古
人言苦節不可貞

述華清宮

天寶六載冬十月皇帝如驪山溫泉宮名其宮曰華清

上在蓬萊宮莫若居華清朝朝禮玄閣日日聞體輕大
聖不私己精禋為羣氓

上出蓬萊時六龍儼齊首長道舒羽儀彤雲映前後天

聲殷宇宙真氣到林藪

昔在軒轅朝五城十二樓今我神泉宮獨在驪山陬羣
芳趣順動百辟隨天遊

正月開陽和通門緝元化穆穆眸容歸豈為明燈夜高
山大風起肅肅隨龍駕

上林神君宮此地即明庭山開鴻濛色天轉招搖星三
雪報大有孰謂非我靈

池邊鶴

舞鶴傍池邊水清毛羽鮮立如依岸雪飛似向池泉江
海雖言曠無如君子前

釣魚灣

垂釣綠灣春春深杏花亂潭清疑水淺荷動知魚散日
暮待情人維舟綠楊岸

題太玄觀

門外車馬喧門裏宮殿清行即翳若木坐即吹玉笙所
喧既非我真道其冥冥

喫茗粥作

當晝暑氣盛鳥雀靜不飛念君高梧陰復解山中衣數
片遠雲度曾不蔽炎暉淹留膳茶粥共我飯蕨薇敞廬
既不遠日暮徐徐歸

泛茅山東谿

清晨登仙峯峯遠行未極江海霽初景草木含新色而
我任天和此時聊動息望鄉白雲裏發棹清谿側松栢
生深山無心自貞直

過新豐道中

二十八年
有詔種果

西下長樂坂東入新豐道雨多車馬稀道上生秋草太
陰蔽皋陸莫知晚與早雷雨杳冥冥川谷漫浩浩詔書
植嘉木衆言桃李好自愧無此容歸從漢陰老

泊舟貽潘少府

時潘在
後浦

行子苦風潮維舟未能發宵分卷前幔卧視清秋月四
澤葭葦深中洲煙火絕蒼蒼水霧起落落疎星沒所遇
盡漁商與言多楚越其如念極浦又以思明哲常若干

里餘況之異鄉別

仲夏入園中東陂

方塘深且廣伊昔俯吾廬環岸垂綠柳盈潭發紅蕖上
延北原秀下屬幽人居暑雨若混沌晴明如空虛此鄉
多隱逸水陸見樵漁廢賞亦何貴為歡良易攄且言重
觀國當此賦歸歟

終南幽居獻蕪侍郎

時拜太
祝未上

暮春天氣和登嶺望層城朝日懸清景魏我宮殿明聖

君常臨朝達士復懸衡道近無良足歸來卧山楹靈堦
曝仙書深室鍊金英春巖松栢秀晨路鷓雞鳴羽化既
有言無然悲不成

中歲尚微道始知將谷神抗策還南山水木自相親深
林門一道青嶂成四鄰平明去採薇日入行刈薪雲歸
萬壑暗雪罷千巖春始看玄鳥來已見瑤華新寄言寥
芳者無乃後時人

卜築青巖裏雲蘿四垂陰虛室若無人喬木自成林時

有清風至側聞樵采音鳳凰鳴高岡望望隔層岑既言
山路遠復道谿谷深倥佯空中遊虬龍水間吟何當見
輕翼為我達遠心

田家即事

蒲葉日已長荇花日已滋老農要看此貴不違天時迎
晨起飯牛雙駕耕東菑蚯蚓土中出田鳥隨我飛羣合
亂啄噪嗷嗷如道饑我心多惻隱顧此兩傷悲撥食與
田鳥日暮空筐歸親戚更相諒我心終不移

同王十三維偶然作

仲夏日中時草木看欲焦
田家惜功力把鋤來東皋
顧望浮雲陰往往誤傷苗
歸來悲困極兄嫂共相饒
無錢可沽酒何以解劬勞
夜深星漢明庭宇虛寥寥
高柳三五株可以獨逍遙

北山種松柏南山種蒺藜
出入雖同趣所尚各有宜
孔丘貴仁義老氏好無為
我心若虛空此道將安施
暫過伊闕間晼晚三伏時
高閣入雲中芙蓉滿清池
要自非

我室還望南山陞

野老本貧賤冒雨鋤瓜田一畦未及終樹下高枕眠荷
蓀者誰子皤皤來息肩不復問鄉墟相見但依然腹中
無一物高話羲皇年落日臨層隅逍遙望晴川使婦提
蠶筐呼兒榜漁船悠悠泛綠水去摘浦中蓮蓮花艷且
美使我不能還

浮雲在空虛隨風復卷舒我心方處順動作何憂虞但
言嬰世網不復得閒居迢遞別東國超遙來西都見人

乃恭敬曾不問賢愚雖若不能言中心亦難誣故鄉滿
親戚道遠情日疎偶欲陳此意復無南飛鳧

黃河流向東弱水流向西趨舍各有異造化安能齊妾
本邯鄲女生長在叢臺叶既聞容見寵復想元為妻刻
畫尚風流幸會君招攜逶迤歌舞座婉戀芙蓉闈日月
方向除恩愛忽焉睽棄置誰復道但悲生不諧羨彼匹
婦意偕老常同棲

日暮登春山山鮮雲復輕遠近看春色踟躕新月明仙

人浮丘公對月時吹笙丹鳥飛熠熠蒼蠅亂營營羣動
汨我真訛言傷我情安得如子晉與之遊太清

空山暮雨來衆鳥竟棲息斯須照夕陽雙雙復撫翼我
念天時好東田有稼穡浮雲蔽川原新流集溝洫徘徊
顧衡宇僮僕邀我食卧覽牀頭書睡看機中織想見明
膏煎中夜起唧唧

田家雜興

春至鶻鷓鳴薄言向田墅不能自力作黽勉娶鄰女既

念生子孫方思廣園圃閒時相顧笑喜悅好禾黍夜夜
登嘯臺南望洞庭渚百草被霜露秋山響砧杵却羨故
年時中情無所取

衆人恥貧賤相與尚膏腴我情既浩蕩所樂在畝漁山
澤時晦暝歸家暫閒居滿園植葵藿繞屋樹桑榆禽雀
知我閒翔集依我廬所願在優游州縣莫相呼日與南
山老兀然傾一壺

道遙阡陌上遠近無相識落日照秋山千巖同一色網

詈繞深莽鷹鷂始輕翼獵馬既如風奔獸莫敢息駐旗
滄海畔搗士吳宮側楚國有夫人性情本貞直鮮禽徒
自致終歲竟不食

田家趣隴畝當晝掩虛闕鄰里無煙火兒童共幽閒桔
槔懸空圃雞犬滿桑間須臾農事隙採藥遊名山但願
所采多不言路險艱人生如蜉蝣一往不可攀君看西
王母千歲美容顏

貧士養情性不復知憂樂去年行賣畚留滯南陽郭秋

至黍苗黃無人可刈獲孺子朝來飯把竿逐鳥雀忽見
梁將軍乘車出宛洛意氣軼道路光輝滿墟落安知負
薪者啞啞笑輕薄

楚山有高士梁國有遺老築室既相鄰同田復同道糗
糒常共飯兒孫每更抱忘此耕耨勞愧彼風雨好蟋蟀
鳴空澤鷓鴣傷秋草日夕寒風來衣裳苦不早

梧桐蔭我門薜荔網我屋超超兩夫婦朝出暮還宿稼
穡既自種牛羊還自牧日旰懶耕鋤登高望川陸空山

足禽獸墟落多喬木白馬誰家兒聯翩相馳逐

種桑百餘樹種黍三十畝衣食既有餘時時會親友夏

來菰米飯秋至菊花酒孺人喜

一作善

逢迎稚子解趨走

日暮閒園裏團團蔭榆柳酩酊乘夜歸涼風吹戶牖清
淺望河漢低昂看北斗數罌猶未開明朝能飲否

題辨覺精舍

朝隨秋雲陰乃至青松林花閣空中遠方池巖下深竹
風亂天語谿響成龍吟試問真君子遊山非世心

行次田家澳梁作

田家俯長道邀我避炎氛當暑日方晝高天無片雲桑
間禾黍氣柳下牛羊羣野雀棲空屋晨風不復聞前登
澳梁坂極望溫泉分逆旅方三舍西山猶未曛

秋次灞亭寄申大

橘柚植寒陵芙蓉帶修坂無言不得意得意何由展況
我行且徒而君往猶蹇既傷人事近復言天道遠薄暮
入空亭中夜不能飯南聽鴻雁盡西見招搖轉千門漢

王宮百里周王苑杲杲初景出油油鮮雲卷會朝幸歲
正校獵從秋猶念君久京國雙涕如露泣無人薦子雲
太息竟誰辨

晚霽中園喜赦作

五月黃梅時陰氣蔽遠邇煙雲連晦朔菰菜生鄰里落
日燒霞明農夫知雨止幾悲衽席濕長歎垣牆毀曠朗
天宇開家族躍以喜渙汗發大號坤元更資始散衣出
中園小徑尚滑履池光搖萬象倏忽滅復起嘉樹如我

心欣欣豈云已

夏日尋藍田唐丞登高宴集

東望春明門駕言聊出遊南行小徑盡綠竹臨清流君
出罷六安居此澹忘憂園林與城市閭井隨人幽披顏
闕衡闈置酒登崇丘山河臨咫尺宇宙窮寸眸是時春
載陽佳氣滿皇州宮殿碧雲裏鴛鴦初命儔良辰方在
茲志士安得休成名苟有地何必東陵侯

同諸公登慈恩寺塔

金祠起真宇直上青雲垂地靜我亦閒登之清秋時蒼
蕪宜春苑片碧昆明池誰道天漢高逍遙方在茲虛形
賓太極攜手行翠微雷雨傍杳冥鬼神中躑踞靈變在
倏忽莫能窮天涯冠上閶闔開履下鴻雁飛宮室低邈
迤羣山小參差俯仰宇宙空庶隨了義歸前劣非大厦
久居亦以危

同諸公秋霽曲江俯見南山

天靜終南高俯映江水明有若蓬萊下淺深見澄瀛羣

峯懸中流石壁如瑤瓊魚龍隱蒼翠鳥獸遊清冷菰蒲
林下秋薜荔波中輕山夏浴蘭止水若居雲屏嵐氣浮
渚宮孤光隨曜靈陰陰豫章館宛宛百花亭大君及羣
臣宴樂方嚶鳴吾黨二三子蕭晨怡性情逍遙滄洲時
乃在長安城

貽劉高士別

夙駕出東城城傍早霞散初日照龍闕
峩峩在天半壯哉麗百常美矣崇兩觀
俯視趨朝客簪珮何璀璨而我

送將歸徘徊灞陵岸北雲去吳越南雁離江漢伊昔蹈
丘園翩翩理文翰高談閔仲叔逸氣劉公幹每言竹柏
貞常輕朝市玩山晝猿狖靜谿曛魚鳥亂寧止卧崆峒
直云期汗漫聖君既理厯族士咸炳煥矯首來天地振
羽泛漪瀾元淑命不違伯鸞吟可歎東去姑蘇臺乃過
陟陽館舍轡函關道浮舟滄海畔耳目曠暄涼懷抱盈
悲惋沈沈青歲晚靄靄秋雲換自言永遯棲無復從羈
絆揮手謝知己知己莫能讚

山中貽崔六琪華

恍惚登高嶺徘徊看落日遙想仲長園如親幼安室春
渚菖蒲登山中播穀鳴相思不道遠太息未知情意君
來此地時復疎林薄中夜掃衡門迎晨閉茵閣屣履清
池上家僮奉信歸憂隨落花散目送歸雲飛故交在天
末新知復千里無人暫往來獨作中林士

鞏城南河作寄徐三景暉

初年雨候遲鞏洛河流小搖搖芳草岸屢見春山曉清

露洗雲林輕波戲魚鳥唯言故人遠不念鄉川眇舟楫
去縈迴湍淑行奔峭寄書千里路莫道南鴻少

華陰作貽祖三詠

朝行敷水上暮出華山東高館宿初靜長亭秋轉空日
餘久淪汨重此聞霜風浙滙入谿樹颼颼驚夕鴻悽然
望伊洛如見息陽宮舊識無高位新知盡固窮夫君獨
輕舉遠近善文雄豈念千里駕崎嶇秦塞中

閒居

薄遊何所愧，所愧在閒居。親故不來往，中園時讀書。步
欄滴餘雪，春塘抽新蒲。梧桐漸覆井，時鳥自相呼。悠然
念故鄉，乃在天一隅。安得如浮雲，來往方須臾。

同王十三維哭殷遙

生理無不盡，念君在中年。遊道雖未深，舉世莫能賢。筮
仕苦貧賤，為客少田園。膏腴不可求，乃在許西偏。四鄰
盡桑柘，咫尺步開牆。垣內艱未及，虞形影隨化。遷茅茨，俯
苦蓋。雙殯兩楹間，時聞孤女號。迴出陌與阡，慈鳥亂飛。

鳴猛獸亦以跽故人王夫子靜念無生篇哀樂久已絕
聞之將泣然太陽蔽空虛雨雪浮蒼山迢遞親靈櫬顧
予悲絕絃處順與安時至此乃空言

新豐主人

新豐主人新酒熟舊客還歸舊堂宿滿酌香含北砌花
盈樽色泛南軒竹雲散天高秋月明東家少婦解秦箏
醉來忘却巴陵道夢中疑是洛陽城

薔薇篇

裊裊長數尋青青不作林一莖獨秀當庭心數枝分作
滿庭陰春日遲遲將欲半庭影離離正堪玩枝上嬌鶯
不畏人葉底飛蛾自相亂秦家女兒愛芳菲畫眉相喚
采葦蕤高處紅鬚欲就手低邊綠刺已牽衣蒲萄架上
朝光滿楊柳園中冥鳥飛連袂踏歌從此去風吹香氣
逐人歸

近體詩

臨江亭五咏 并序

建業為都舊矣晉主來此而禮物盡備雖云在
德亦云在險京口其地也嗚呼有邦國者有廢
興焉自晉及陳五世遞嬗以今懷古五篇為咏
臨江亭得其勝槩寄以興言雖未及乎辯士亦
其志也

晉家南作帝京鎮北為關江水中分地城樓下帶山金
陵事已往青蓋理無還落日空亭上愁看龍尾灣

山橫小苑前路盡大江邊此地興王業無如宋主賢潮

生建業水風散廣陵煙直望清波裏祇言別有天
城頭落暮暉城外搗秋衣江水青雲挹蘆花白雪飛南
州王氣疾東國海風微借問商歌客年年何處歸

古木嘯寒禽層城帶夕陰梁園多綠樹楚國盡楓林山
際空為險江流長自深平生何以恨天地本無心
京山千里過孤憤望中來江勢將天合城門向水開落
霞明楚岸夕露濕吳臺去去無相識陳皇安在哉

泊江潭貽馬校書

明月掛青天遙遙如目前故人遊畫閣却望似雲邊水
宿依漁父歌聲和采蓮采蓮江上曲今夕為君傳

夜觀妓

白雪宜新舞清宵召楚妃嬌童攜錦薦侍女整羅衣花
映垂鬟轉香迎步履飛徐徐斂長袖雙燭送將歸

官莊池觀競渡

落日吹簫管清池發棹歌船爭先後渡岸激去來波水
葉藏魚鳥林花間綺羅踟躕仙女去猶似望天河

霽後貽馬十二巽

高天風雨散清氣在園林
況我夜初靜當軒鳴綠琴
雲開北堂月庭滿南山陰
不見長裾者空歌遊子吟

題山中流泉

山中有流水借問不知名
映地為天色飛空作雨聲
轉來深澗滿分出小池平
恬澹無人見年年長自清

題陸山人樓

暮聲雜初雁夜色涵早秋
獨見海中月照君池上樓
山

雲拂高棟天漢入雲流不惜朝光滿其如千里遊

漢陽即事

楚國千里遠孰知方寸違春遊歡有客夕寢賦無衣江
水帶冰綠桃花隨雨飛九歌有深意捐珮乃言歸

寒夜江口泊舟

寒潮信未起出浦纜孤舟一夜苦風浪自然增旅愁吳
山遲海月楚火照江流欲有知音者異鄉誰可求

苑外至龍興院作

朝遊天苑外，忽見法筵開。
山勢當空出，雲陰滿地來。
疎鐘清月殿，幽梵靜花臺。
日暮香林下，飄飄仙步迴。

隴頭水送別

相送隴山頭，東西隴水流。
從來心膽盛，今日為君愁。
暗雪迷征路，寒雲隱戍樓。
唯餘旌旆影，相逐去悠悠。

洛橋送別

河橋送客舟，河水正安流。
遠見輕橈動，遙憐故國遊。
海禽逢早雁，江水值新秋。
一聽南津曲，分明散別愁。

洛潭送人覲省

清洛帶芝田東流入大川
舟輕水復急別望杳如仙
細草生春岸明霞散早天
送君唯一曲當是白華篇

張谷田舍

縣官清且儉深谷有人家
一徑入寒竹小橋穿野花
碓喧春澗滿梯倚綠桑斜
自說年來稔前村酒可賒

藍上芳次期王維補闕

見王維集

山中人不見雲去夕陽過
淺瀨寒魚少叢蘭秋蝶多
老

年疎世事幽性樂天和酒熟思才子谿頭望玉珂

田家即事

桑柘悠悠水蘸堤晚風晴景不妨犁高機猶織卧蠶子
下坂饑逢餉饁妻杏色滿林羊酪熟麥涼浮壠雉媒低
生時樂死皆由命事在旻天迴不迷

長安道

鳴鞭過酒肆袷服遊倡門百萬一時盡含情無片言
西行一千里暝色生寒樹暗聞歌吹聲知是長安路

洛陽道獻呂四郎中

洛水春冰開洛城春樹綠朝看大道上落花亂馬足
春風二月時道傍柳堪把上枝覆官閣下枝拂車馬
洛水照千門千門碧空裏少年不得志走馬遊新市

江南曲

綠江深見底高浪直翻空慣是湖邊住舟輕不畏風
逐流牽荇葉綠岸摘蘆苗為惜鴛鴦鳥輕輕動畫橈
日暮長江裏相邀歸渡頭落花如有意來去逐船流

隔江看樹色沿月聽歌聲不是長干住那從此路行

同武平一員外遊湖

竹吹留歌扇蓮香入舞衣前溪多曲渚乘興莫先歸

明妃曲

日暮驚沙亂雪飛傍人相勸易羅衣強來前殿看歌舞
共待單于夜獵歸

同武平一員外遊湖

青林碧嶼暗相期緩楫揮觥欲賦詩借問高歌凡幾轉

河低月落五更時

朝來仙閣聽絃歌
暝入花亭見綺羅
池邊命酒憐風月
浦口迴船惜芰荷

朦朧竹影蔽巖扉
淡蕩荷風飄舞衣
舟尋綠水宵將半
月隱青林人未歸

花潭竹嶼傍幽溪
畫楫浮空入夜谿
芰荷覆水船難進
歌舞留人月易低

寄孫山人

新林二月孤舟還水滿清江花滿山借問故園隱君子
時時來往在人間

嚴武

武字季鷹華州人
中書侍郎挺之之子
神氣雋朗敏於見聞
弱冠哥舒翰奏充判官
遷侍御史至德中累為劍南東川節度成都尹兼御史大夫尋遷黃門侍郎復拜成都尹劍南節度等使廣德中破吐蕃改檢校吏部尚書封鄭國公

紀事云武年二十二為給事黃門郎明年擁旄西
蜀杜甫乘醉言不謂嚴挺之乃有此子也武志目
久之曰杜審言孫子擬捋虎鬚合坐皆笑以彌縫
之房太尉瑄微有所忤憂怖成疾李太白作蜀道
難為房杜危之也

古體詩

題巴州光祿寺楠木

楚江長流對楚寺楠木幽生赤崖背臨谿插石盤老根

苔色青蒼山雨痕高枝闌葉鳥不度半掩白雲朝與暮
香殿蕭條轉密陰花龕滴瀝垂清露聞道偏多越水頭
煙生霽歛使人愁月明忽憶湘川夜猿叫還思鄂渚秋
看君幽靄幾千丈寂寞窮山今遇賞亦知鐘梵報黃昏
猶卧禪牀戀竒響

近體詩

酬別杜二

獨逢堯典日再覩漢官時未效風霜勁空慙雨露私夜

鐘清萬戶曙漏拂干旗並向殊庭謁俱承別館追斗城
憐舊路鍋水惜歸期峯樹還相伴江雲更對垂試迴滄
海棹莫妬敬亭詩祇是書應寄無忘酒共持但令心事
在未肯鬢毛衰最悵巴山裏清猿醒夢思

寄題杜拾遺錦江野亭

漫向江頭把釣竿懶眠沙草愛風湍莫倚善題鸚鵡賦
何須不著鷓鴣冠腹中書籍幽時曬肘後醫方靜處看
興發會能馳駿馬應須直到使君灘

巴嶺答杜二見憶

卧向巴山落日時，兩鄉千里夢相思。
可但步兵偏愛酒，也知光祿最能詩。
江頭赤葉楓愁客，籬外黃花菊對誰。
跂馬望君非一度，冷猿秋雁不勝悲。

軍城早秋

昨夜秋風入漢關，朔雲邊月滿西山。
更催飛將追逃虜，莫遣沙場匹馬還。

鄭虔

虔鄭州滎陽人天寶初為協律郎或告其私撰國
史坐謫十年還京以不事事更為置廣文館以虔
為博士自寫其詩畫以獻帝署曰鄭虔三絕後貶
台州司戶叅軍

近體詩

閨情

銀鑰開香閣金臺點夜燈
長征君自慣獨卧妾何曾

崔成甫

成甫開元末為陝縣尉李白澤畔吟序云澤畔吟者逐臣崔公所作云代業文宗早茂才秀起家校書蓬山再尉闕輔中佐於憲車因貶湘陰流離沅湘摧悴草莽忠憤義烈形於清辭其怨者之流乎近體詩

贈李十二白

我是瀟湘放逐臣
君辭明主漢江濱
天外常求太白老
金陵捉得酒仙人

奚賈

賈常建同時人

近體詩

尋許山人亭子

桃源若遠近漁子棹輕舟
川路行難盡人家到漸幽
山禽拂席起溪水入庭流
君是何年隱如今成白頭

李康成

康成天寶中與李杜同時撰玉臺後集

古體詩

采蓮曲

采蓮去月沒春江曙翠鈿紅裏水中央青荷蓮子雜衣
香雲起風生歸路長歸路長那得久各迴船兩搖手

自君之出矣

自君之出矣絃吹絕無聲思君如百草撩亂逐春生



御定全唐詩錄卷十七

欽定四庫全書

集部

御定全唐詩錄卷十八

詳校官左中允_臣 瑋五珠

主事銜_臣 徐以坤覆勘

總校官原任中允_臣 王燕緒

校對官中書_臣 嵇承志

謄錄監生_臣 熊夢祖

欽定四庫全書

御定全唐詩錄卷十八

元結

結字次山瀼州人少不羈年十七折節向學事元
德秀天寶十二載舉進士禮部侍郎陽浚見其文
曰一第恩子耳有司得子是賴果擢上第後舉制
科國子司業蘇源明薦結於肅宗上時議三篇帝
悅擢右金吾兵曹參軍攝監察御史為山南西道

節度參謀以討賊功遷監察御史裏行進水部郎
佐荆南節度使呂誼又叅山南東道來瑱府瑱誅
攝領府事代宗立固辭丐侍親樊上授著作郎拜
道州刺史流亡歸者萬餘進容管經略使民樂其
教立石頌德嘗著元子十篇故以元子為稱兵亂
入猗玗洞稱猗玗子後家灤濱稱浪士及有官人
以為浪者亦漫為官乎呼為漫郎樊上漁者相戲
更為聱叟又稱漫叟所著有文編李商隱為之序

歸來子云結性耿介有憂道憫俗之意天寶之亂
或仕或隱自謂與世聱牙故其見於文字者亦沖
澹而隱約譬古鐘磬不諧於里耳而詞義微妙翫
之翛然若有塵外之趣

古體詩

補樂歌

網罟 網罟伏羲氏之樂歌也其義蓋稱伏羲
能易人取禽獸之勞凡二章章四句

吾人苦兮水深深網罟設兮水不深

吾人苦兮山幽幽網罟設兮山不幽

鍾惺云老莊著書
深旨尋常拈出

系樂府

天寶辛未中元子將前世嘗可稱歎者為詩十

二篇

錄八
篇

為引其義名之總命曰系樂府古人

詠歌不盡其情聲者化金石以盡之其歡怨甚

耶戲

呼音

盡歡怨之聲者可以上感於上下化於

下故元子系之

思太古

東南三千里沅湘為太湖湖上山谷深有人多似愚嬰
孩寄樹顛就水捕鷓於都反鱸所歡同鳥獸身意復何拘
吾行遍九州此風皆已無吁嗟聖賢教不覺久踟躕

賤士吟

南風發天和和氣天下流能使萬物榮不能變羈愁為
愁亦何爾自請說此由諂競實多路苟邪皆共求嘗聞
古君子指以為深羞正方終莫可江海有滄洲

欵乃曲

誰能聽欵乃欵乃感人情不恨湘波深不怨湘水清所
嗟豈敢道空羨江月明昔聞扣斷舟引釣歌此聲始歌
悲風起歌竟愁雲生遺曲今何在逸為漁父行

貧婦詞

誰知苦貧夫家有愁怨妻請君聽其詞能不為酸悽所
憐抱中兒不如山下麁空念庭前地化為人吏蹊出門
望山澤回頭心復迷何時見府主長跪向之啼

去鄉悲

踟躕古塞闕悲歌為誰長日行見孤老羸弱相提將聞
其呼怨聲聞聲問其方乃言無患苦豈棄父母鄉非不
見其心仁惠誠所望念之何可說獨立為悽傷

壽翁興

借問多壽翁何方自修育惟云順所然忘情學草木始
知世上術勞苦化金玉不見充所求空聞恣耽欲清和
存玉母潛渡無亂蹟誰正好長生此言堪佩服

農臣怨

農臣何所怨乃欲干人主不識天地心徒然怨風雨將
論草木患欲說昆蟲苦巡迴宮闕傍其意無由吐一朝
哭都市淚盡歸田畝謠頌若採之此言當可取

下客謠

下客無黃金豈思主人憐客言勝黃金主人然不然珠
玉成彩翠綺羅如嬋娟終恐見斯好有時去君前豈知
保忠信長使令德全風聲與時茂歌頌萬千年

與灤溪鄰里

有序

乾元元年元子將家自全於灤溪上元二年領
荆南之兵鎮於九江方在軍旅與灤溪鄰里不
得如往時相見遊又知灤溪之人日轉窮困故
作詩與之

昔年苦逆亂舉族來南奔日行幾十里愛君此山村峯
谷呀回映誰家無泉源修竹多夾路扁舟皆到門灤溪
中曲濱其陽有閒園鄰里昔贈我許之及子孫我嘗有

匱乏鄰里能相分我嘗有不安鄰里能相存斯人轉貧
弱力役非無寃終以灤濱訟無令天下論

喻灤溪鄉舊遊

昔年在灤濱灤人皆忘情今來游灤鄉灤人見我驚我
心與灤人豈有辱與榮灤人異其心應為我冠纓昔賢
惡如此所以辭公卿貧窮老鄉里自休還力耕況曾經
逆亂日厭聞戰爭尤愛一溪水而能存讓名終當來其
濱飲啄全此生

忝官引

天下昔無事僻居養愚鈍山野性所安熙然自全順忽
逢暴兵起閭巷見軍陣將家瀛海濱自棄同芻蕘往在
乾元初聖人啟休運公車詣魏闕天子垂清問敢誦王
者箴亦獻當時論朝廷愛方直明主嘉忠信屢授不次
官曾與專征印兵家未曾學榮利非所徇偶得充醜降
功勞愧分寸爾來將四歲慙恥言可盡請取寃者辭為
吾忝官引寃亂何者苦萬邑餘灰燼寃辭何者悲生人

盡鋒刃寃辭何者甚力役遇勞困寃辭何者深孤弱亦
哀恨無謀救寃者祿位安可近而可愛軒裳其心又干
進此言非作戒此言敢貽訓實欲辭無能歸耕守吾分

樊上漫作

漫家郎亭下復在樊水邊去郭五六里扁舟到門前山
竹遶茅舍庭中有寒泉西邊雙石峯引望堪忘年四鄰
皆漁父近渚多閒田且欲學耕釣於斯求老焉

酬孟武昌苦雪

積雪閉山路有人到庭前云是孟武昌令獻苦雪篇長
吟未及終不覺為悽然古之賢達者與世竟何異不能
救時患諷諭以全意知公惜春物豈非愛時和知公苦
陰雪傷彼災患多姦兇正驅馳不合問君子林鶯與野
獸無乃怨於此兵興向九歲稼穡誰能憂何時不發卒
何日不殺牛耕者日已少耕牛日已稀皇天復何忍更
入恐斃之自經危亂來觸物堪傷歎見君問我意只益
胷中亂山禽饑不飛山木凍皆折懸泉化為冰寒水近

不熱出門望天地天地皆昏昏時見雙峰下雪中生白雲

喻舊部曲

漫遊拱水陰忽見舊部曲尚言軍中好猶望有所屬故
令爭者心至死終不足與之一杯酒喻使燒戎服兵興
向十年所見堪歎哭相逢是遺人當合識榮辱勸汝學
全生隨我畬退谷

雪中懷孟武昌

冬來三度雪農者歡歲稔我麥根已濡各得在倉廩天
寒未能起孺子驚人寢云有山客來籃中見冬蕈燒柴
為溫酒煮鱖為作潘客亦愛杯樽思君共杯飲所嗟山
路閒時節寒又甚不能苦相邀興盡還就枕

招孟武昌

并序

漫叟作退谷銘指曰干進之客不得遊之作杯
湖銘指曰為人厭者勿泛杯湖孟士源嘗黜官
無情干進在武昌不為人厭可遊退谷可泛杯

湖故作詩招之

風霜枯萬物退谷如春時窮冬涸江海杯湖澄清漪湖
盡到谷口單船近塔墀湖中更何好坐見大江水敬石
為水涯半山在湖裏谷口更何好絕壑流寒泉松桂蔭
茅舍白雲生坐邊武昌不干進武昌人不厭退谷正可
遊杯湖任來泛湖上有水鳥見人不飛鳴谷中有山獸
往往隨人行莫將車馬來令我鳥獸驚

登殊亭作

時節方大暑試來登殊亭憑軒未及息忽若秋氣生主人既多閒有酒共我傾坐中不相異豈恨醉與醒漫歌無人聽浪語無人驚時復一回望心目出四溟誰能守纓佩日與災患并請君誦此意令彼惑者聽

漫酬賈沔州

有序

賈德方與漫叟者懼漫叟不能甘窮獨懼漫叟又須為官故作詩相喻其指曰勸爾莫作官作官不益身因德方之意遂漫酬之

往年壯心在嘗欲濟時難奉詔舉州兵令得誅暴叛上
將屢顛覆偏師常救亂未曾弛戈甲終日領簿案出入
四五年憂勤忘昏旦無謀靜堯醜自覺愚且悞豈欲阜

樞中爭食麩與賢

麩糠中可食者下沒反牛
馬食餘草節曰賢下諫反

去年辭職

事所懼貽憂患天子許安親官又得閒散自家樊水上
性情尤荒慢雲山與水木似不憎吾漫以茲忘時世日
益無畏憚漫醉人不嗔漫眠人不喚漫遊無遠近漫樂無
早晏漫中漫亦忘名利誰能筭聞君勸我意為君一長

歎人誰年八十我已過其半家中孤弱子長子未及冠
且為兒童主種藥老溪澗

春陵行 有序

癸卯歲漫叟授道州刺史道州舊數萬餘戶經
賊以來不滿四千大半不勝賦稅到官未五十
日承諸使徵求符牒二百餘封皆曰失其限者
罪至貶削於戲若悉應其命則州縣破亂刺史
欲焉逃罪若不應命又即獲罪戾必不免也吾

將守官靜以安人待罪而已此州是春陵故地
故作春陵行以達下情

軍國多所須切責在有司有司臨郡縣刑法競欲施供
給豈不憂徵斂又可悲州小經亂後遺人實困疲大鄉
無十家大族命單羸朝食是草根暮食求木皮出言氣
欲絕意速行步遲追呼尚不忍況乃鞭扑之郵亭傳急
符往來跡相追更無寬大恩但有迫促期欲令鬻兒女
言發恐亂隨悉使索其家而又無生資聽彼道路言怨

傷誰復知去冬山賊來殺奪幾無遺所願見王官撫養
以惠慈奈何重驅逐不使存活為安人天子命符節我
所持州縣忽亂荒得罪復是誰逋緩違詔令蒙責固所
宜前賢重守分惡以禍福移亦云貴守官不愛能適時
顧惟孱弱者正直當不虧何人采國風吾欲獻此辭

賊退示官吏

有序

癸卯歲西原賊入道州焚燒殺掠幾盡而去明
年賊又攻永州破邵不犯此州邊鄙而退豈力

能制敵歟蓋蒙其傷憐而已諸使何為忍苦徵
斂故作詩一篇以示官吏

昔歲逢太平山林二十年泉源在庭戶洞壑當門前井
稅有常期日晏猶得眠忽然遭世變數歲親戎旃今來
典斯郡山夷又紛然城小賊不屠人貧傷可憐是以陷
鄰境北州獨見全使臣將王命豈不如賊焉今彼徵斂
者迫之如火煎誰能絕人命以作時世賢思欲委符節
引竿自刺船將家就魚麥歸老江海邊

遊漣泉示泉上學者

顧吾漫浪久不欲有此拘每到漣泉上情性可安舒
草堂在山曲澄瀾涵堦除松竹蔭幽徑清源湧坐隅築塘
列圃畦引流灌時蔬復在郊郭外正堪靜者居愜心則
自適喜尚人或殊此中若可安不佩銅虎符

石魚湖上作

有序

漣泉南上有獨石在水中狀如遊魚魚凹處修
之可以踞

舉魚反

酒水涯四匝多敲石相連石上

堪人坐水能浮小舫載酒又能繞石魚洄流乃
命湖曰石魚湖鐫銘于湖上顯示來者又作詩
以歌之

吾愛石魚湖石魚在湖裏魚背有酒樽繞魚是湖水兒
童作小舫載酒勝一杯座中令酒舫空去復滿來湖岬
多敬石石下流寒泉醉中一盥漱快意無比焉金玉吾
不須軒冕吾不愛且欲坐湖畔石魚長相對

宴湖上亭作

廣亭蓋小湖湖亭實清曠軒窓幽水石怪異尤難狀石
樽能寒酒寒水宜初漲岸曲坐客稀杯浮上搖漾遠風
入簾幕浙瀝吹酒舫欲去未回時飄飄正堪望酣興思
共醉促酒更相向舫去若驚鳧溶瀛滿湖浪朝來暮忘
返暮歸獨惆悵誰肯愛林泉從吾老湖上

引東泉作

東泉人未知在我左山東引之傍山來垂流落庭中宿
霧含朝光掩映如殘虹有時散成雨飄灑隨清風衆源

發淵竇殊怪皆不同此流又高懸瀟瀟

字素反

在長空山

林何處無茲地不可逢吾欲解纓佩便為泉上翁

登白雲亭

出門上南山喜逐松逕行窮高欲極遠始到白雲亭長
山繞井邑登望宜新晴洲渚曲湘水縈迴隨郡城九疑
千萬峰嶸嶸天外青煙雲無遠近皆傍林嶺生俯視松
竹間石水何幽清涵映滿軒戶娟娟如鏡明何人病懣
濃積醉且未醒與我一登臨為君安性情

漣陽亭作

有序

初得漣泉則為亭於泉上因開簷雷又得石渠
泉渠相宜亭更加好以亭在泉北故命之曰漣
陽亭

問吾常讌息泉上何處好獨有漣陽亭令人可終老前
軒臨漣泉憑几漱清流外物自相擾淵淵還復休有時
出東戶更欲簷下坐非我意不行石渠能留我峯石若
鱗次欹垂復旋迴為我引漣泉泠泠簷下來天寒宜泉

溫泉寒宜大暑誰到漈陽亭其心肯思去

夜譙石魚湖作

風霜雖慘然出遊熙天正

平聲

登臨日暮歸置酒湖上亭

高燭照泉深光華溢軒楹如見海底日曛曛始欲生夜
寒閉窓戶石溜何清泠若在深洞中半崖聞水聲醉人
疑舫影呼指遞相驚何故有雙魚隨吾酒舫行醉昏能
誕語勸醉莫忘情坐無拘忌人勿限醉與醒

招陶別駕家陽華作

海內厭兵革騷騷十二年陽華洞中人似不知亂焉誰
能家此地終老可自全草堂背巖洞幾峯軒戶前清渠
匝庭堂出門仍灌田半崖盤石徑高亭臨極顛引望見
何處逶迤隴北川杉松幾萬株蒼蒼滿前山巖高暖華
陽飛溜何潺潺洞深迷遠近但覺多洄淵晝遊興未盡
日暮不欲眠探燭飲洞中醉昏漱寒泉始知天下心耽
愛各有偏陶家世高逸公忍不獨然無或畢婚嫁竟為
俗務牽

劉侍御月夜燕會

有序

兵興已來十一年矣獲與同志歡醉達旦詠歌
取適無一二焉乙巳歲彭城劉靈源在衡陽逢
故人或有人在者日昔相會第歡遠遊始與諸公
待月而笑語竟與諸公愛月而歡醉詠歌夜久
賦詩言懷於戲文章道喪蓋久矣時之作者煩
雜過多歌兒舞女且相喜愛系之風雅誰道是
耶諸公常欲變俗之淫靡為後生之規範今夕

豈不能道達情性成一時之美乎

我從蒼梧來將耕舊山田
踟蹰為故人且復停歸船
日夕得相從轉覺和樂全
愚愛涼風來明月正滿天
河漢望不見幾星猶粲然
中夜興欲酣改坐臨清川
未醉恐天旦更欲促繁絃
歡娛不可逢請君莫言旋

別孟校書

有序

平昌孟雲卿與元次山同州里以辭學相友幾二十年次山今罷守春陵雲卿始典校芸閣於

戲材業次山不如雲卿辭賦次山不如雲卿通
和次山不如雲卿在次山又詡然求進者也誰
言時命吾欲聽之次山今且未老雲卿少次山
六七歲雲卿聲名滿天下知已在朝廷及次山
之年雲卿何事不可至勿隨長風乘興蹈海勿
愛羅浮往而不歸南海幕府有樂安任鴻與次
山最舊請任公為次山一白府主趣資裝雲卿
使北歸慎勿令徘徊海上諸公第作歌送之

吾聞近南海乃是魑魅鄉忽見孟夫子歡然遊北方忽
喜海風來海帆又欲張漂漂隨所去不念歸路長君有
失母兒愛之似阿陽始解隨人行不欲離君傍相勸早
旋歸此言慎勿忘

別何員外

誰能守清躅誰能嗣世儒吾見何君饒為人有是夫黜
官二十年未曾暫崎嶇終不病貧賤寥寥無所拘忽然
逢知己數月領官符猶是尚書郎收賦來江湖人皆悉

蒼生隨意極所須比盜無兵甲似偷又不如公能獨寬
大使之力自輸吾欲探時謠為公伏奏書但恐抵忌諱
未知肯聽無不然且相送醉歡於坐隅

窳樽詩

在道州

巉巉小山石數峰對窳亭窳石堪為樽狀類不可名巡
回數尺間如見小蓬瀛樽中酒初漲始有島嶼生豈無
日觀峰直下臨滄溟愛之不覺醉醉卧還自醒醒醉在
樽畔始為吾性情若以形勝論坐隅臨郡城平湖近堦

砌遠山復青青異木幾十株
枝條冒簷楹盤根滿石上
皆作龍蛇形酒堂貯釀器
戶牖皆罌鉞此樽可常滿
誰是陶淵明

登九疑第二峯

九疑第二峰其上有仙壇
杉松映飛泉蒼蒼在雲端
何人居此處云是魯女冠
不知幾百歲譙坐餌金丹傳
羽化時雲鶴滿峰巒
婦中有高人相望空長歎

宿洄溪翁宅

長松萬枝遶茅舍怪石寒泉近簷下老翁八十猶能行
將領兒孫行拾稼吾羨老翁居處幽吾愛老翁無所求
時俗是非何足道得似老翁吾即休

石魚湖上醉歌

有序

漫叟以公田米釀酒因休暇則載酒於湖上時
取一醉歡醉中據湖岸引臂向魚取酒使舫載
之徧飲坐者意疑倚巴丘酌於君山之上諸子
環洞庭而坐酒舫泛泛然觸波濤而往來者乃

作歌以長之

石魚湖似洞庭夏水欲滿君山青山為樽水為沼酒徒
歷歷坐洲島長風連日作大浪不能廢人運酒舫我持
長瓢坐巴丘酌飲四座以散愁

宿無為觀

九疑山深幾千里峰谷崎嶇人不到山中舊有仙姥家
十里飛泉遶丹竈如今道士三四人茹芝鍊玉學輕身
霓裳羽蓋傍臨壑飄飄似欲來雲鶴

無為洞口作

無為洞口春水滿無為洞傍春雲白愛此踟躕不能去
令人悔作衣冠客洞旁山僧皆學禪無求無欲亦忘年
欲問其心不能問我到此中得無悶

說洄溪招退者

在州南
江華縣

長松亭亭滿四山山間乳竇流清泉洄溪正在此山裏
乳水松膏常灌田松膏乳水田肥良稻苗如蒲米粒長
麋色如玳玉液酒酒熟猶聞松節香溪邊老翁年幾許

長男頭白孫嫁女問言只食松田米無藥無方向人語
沿溪石下多泉源盛暑大寒冬大溫屠蕪宜在水中石
洄溪一曲自當門吾今欲作洄溪翁誰能住我舍西東
勿憚山深與地僻羅浮尚有葛仙翁

宿丹崖翁宅

扁舟欲到瀧口湍春水湍瀧上水難投竿來泊丹崖下
得與堦翁盡一歡丹崖之亭當石顛破竹半山引寒泉
泉流掩映在木杪有若白鳥飛林間往往隨風作霧雨

濕人巾履滿庭前丹崖翁愛丹崖棄官幾年崖下家兒
孫棹船抱酒甕醉裏長歌揮釣車吾將求退與翁遊學
翁歌醉在魚舟官吏隨人往未得却望丹崖慙復羞

近體詩

橘井

靈橘無根井有泉世間如夢又千年鄉園不見重歸鶴
姓字今為第幾仙風冷露壇人悄悄地閒荒徑草綿綿
如何躡得蕪君跡白日霓旌擁上天

欵乃曲

有序

大厯丁未中漫叟以軍事詣都使還州逢春水

舟行不進作欵乃五首

錄四首

舟子唱之蓋欲取

適於道路耳詞曰

湘江二月春水平滿月和風宜夜行唱橈欲過平陽戍
守吏相呼問姓名

千里楓林煙雨深無朝無暮有猿吟停橈靜聽曲中意
好是雲山韶濩音

零陵郡北湘水東浯溪形勝滿湘中溪口石顛堪自逸
誰能相伴作漁翁

下瀧船似入深淵上瀧船似欲昇天瀧南始到九疑郡
應絕高人乘興船

元季川

季川名融以字行次山之弟次山作處規云季川

曰糲復不言糲有意乎

糲凡之別稱義載爾雅
字通云糲乃祝字之訛

古體詩

泉上雨後作

風雨蕩繁暑雷息佳霽初衆峰帶雲色清氣入我廬
颭颭來臨窺愜所圖綠蘿長新蔓裊裊垂坐隅流水
復簷下丹砂發清渠養葛為我衣種芋為我蔬誰是畹
與畦彌漫連野蕪

山中曉興

河漢降玄霜昨來節物殊媿無神仙姿豈有陰陽俱靈
鳥望不見慨然悲高梧華葉隨風揚珍條雜榛蕪為君

寒谷吟歎息知何如

劉春虛

春虛江東人為夏縣令與賀知章包融張旭號吳
中四士

明皇雜錄云天寶中劉春虛輩雖有文章盛名流
落不偶

殷璠云春虛詩情幽興遠思苦語奇忽有所得便
驚衆聽頃東南高唱者數人然聲律婉態無出其

右唯氣骨不逮諸公自永明已還可傑立江表惜
其不永天年隕碎國寶

鍾惺酷愛其詩林茂之作小冊全錄之題其後云
陶公坐高秋俗士不敢入不受人去取孤意先自
立

古體詩

江南曲

美人何蕩漾湖上風日長玉手欲有贈徘徊雙明璫歌

聲隨綠水怨色起青陽日暮還家望雲波橫洞房

暮秋揚子江寄孟浩然

木葉紛紛下東南日煙霜林山相曉暮天海空青蒼暝
色沉復久秋聲亦何長孤舟兼微月獨夜仍越鄉寒笛
對京口故人在襄陽詠思勞今夕江漢遙相望

潯陽陶氏別業

陶家習先隱種柳長江邊朝夕潯陽郭白衣來幾年霽
雲明孤嶺秋水澄寒天物象自清曠野情何聯綿蕭蕭

丘中賞明宰非徒然願守黍稷稅歸耕東山田

登廬山峯頂寺

孤峰臨萬象秋氣何高清天際南郡出林端西江明山
門二緇叟振錫聞幽聲心照有無界業懸前後生雖知
真機靜尚與愛網并方首金門路未遑參道情

尋東谿還湖中作

出山更回首日暮清谿深東嶺新別處數猿叫空林昔
遊有初迹北路還獨尋幽興方在往歸懷復為今雲峯

勞前意湖水成遠心望望已超越坐鳴舟中琴

送韓平兼寄郭微

上客夜相過小童能酌酒即為臨水處正值歸雁後前路望鄉山近家見門柳到時春未暮風景自應有余憶東州人經年別來久殷勤為傳語日夕念攜手兼問前寄書書中復達否

寄閣防

防時在終南
豐德寺讀書

青冥南山口君與緇錫鄰深路入古寺亂花隨暮春紛

紛對寂寞往往落衣巾
松色空照水經聲時有人
晚心復南望山遠情獨親
應以修往業亦惟立此身
深林度空夜煙月資清真
莫歎文明日彌年徒隱淪

越中問海客

風雨滄洲暮一帆今始歸
自云發南海萬里速如飛
初謂落何處永將無所依
冥茫漸西見山色越中微
誰念去時遠人經此路稀
泊舟悲且泣使我亦霑衣
浮海焉用說憶鄉難久違
縱為魯連子山路有柴扉

海上詩送薛文學歸海東

何處歸且遠送君東悠悠滄溟千萬里
日夜一孤舟曠望絕國所微茫天際愁
有時近仙境不定若夢遊或見青色古
孤山百里秋前心方杳眇後路勞夷猶
離別惜吾道風波敬皇休春浮花氣遠
思逐海水流日暮驪歌後永懷空滄洲

近體詩

九日送人

海上正搖落客中還別離同舟去未已遠送新相知流
水意何極滿樽徒爾為從來菊花節早已醉東籬

闕題

道由白雲盡春與青谿長時有落花至遠隨流水香間
門向山路深柳讀書堂幽映每白日清輝照衣裳

寄江滔求孟六遺文

南望襄陽路思君情轉親偏知漢水廣應與孟家鄰在
日貧為善昨來聞更貧相如有遺草一為問家人

積雪為小山

飛雪伴春還春庭曉自閒
虛心應任道遇賞遂成山峰

小形全秀巖虛勢莫攀
以幽能皎潔謂近可循環孤影

臨冰鏡寒光對玉顏
不隨遲日盡留顧歲華間

以幽能皎潔謂

近可循環此劉

君自評其詩也

萬楚

楚登開元進士第

近體詩

五日觀妓

西施漫道浣春紗，碧玉今時鬪麗華。
眉黛奪將萱草色，紅裙妬殺石榴花。
新歌一曲令人艷，醉舞雙眸斂鬢斜。
誰道五絲能續命，却令今日死君家。

題情人藥欄

斂眉語芳草，何許太無情。
正見離人別，春心相向生。
河上逢落花

河上浮落花，花流東不息。
應見浣紗人，為道長相憶。

王之渙

集異記
作渙之

之渙并州人與兄之咸之賁皆有文名與王昌齡

崔國輔聯唱迭和名動一時

近體詩

登鸛鵲樓

白日依山盡黃河入海流欲窮千里目更上一重樓

送別

楊柳東門樹青青夾御河近來攀折苦應為別離多

涼州詞

黃河遠上白雲間一片孤城萬仞山羌笛何須怨楊柳

春光不度玉門關

集異記云開元中渙之與王昌齡高適齊名共詣旗亭賞酒小飲有梨園

伶官十數人會燕三人因避席俛映燵爐以觀焉俄有妙妓四輩奏樂皆當時名部昌齡等私相約曰我輩各擅詩名每不自定甲乙今者可以密觀諸伶所謳若詩入歌詞之多者為優初謳昌齡詩次謳適詩又次復謳昌齡詩渙之自以得名已久因指諸妓中最佳者曰待此子所唱如非我詩即終身不敢與子爭衡次至雙鬟發聲果謳黃河云云因大諧笑諸伶詣問因語其事乃競拜乞就筵席三人從之飲醉竟日

九日送別

薊庭蕭瑟故人稀
何處登高且送歸
今日暫同芳菊酒
明朝應作斷蓬飛

王諲

諲登開元進士第官右補闕

古體詩

夜坐看搗箏

調箏夜坐燈光裏
却挂羅帷露織指
朱絃一一聲不同
玉柱連連影相似
不知何處學新聲
曲曲彈來未覩名

應是石家金谷裏流傳未滿洛陽城

近體詩

長信怨

飛燕倚身輕爭人巧笑名生君棄妾意增妾怨君情日
落昭陽壁秋來長信城寥寥金殿裏歌吹夜無聲

閨情

日暮裁縫歇深嫌氣力微纔能收篋筍懶起下簾帷怨
坐空然燭愁眠不解衣昨來頻夢見夫壻莫應知

蕭穎士

穎士字茂挺與李華齊名號蕭李開元中登進士
第補秘書正字聰警絕倫嘗讀路側古碑一閱即
能成誦名播天下新羅使入朝言國人願得蕭夫
子為師其名動華夷如此終以誕傲褊忿困躓而
卒門人私謚文元先生

穎士以推獎後進為任如李陽李幼皇甫冉陸渭
等數十人由獎目皆為名士天下推知人稱蕭功

曹嘗兄事元德秀而友殷寅顏真卿柳芳陸據李
華邵軫趙驛時人語曰殷顏柳陸李蕭邵趙以能
全其交也

古體詩

江有楓一篇十一章

有序

江有楓思陸鄭二友吳會舊遊且疾讒也臣宦
於尹府以直方不偶見逼讒佞惟古之賢者有
避色避言之義矯然去之二室之間有械樹焉

與江南楓形胥類憩於其下而作是詩以貽夫

二三子焉

江有楓其葉蒙蒙我友自東于以遊從

山有槭其葉漠漠我友徂北于以休息

想彼槭矣亦類其楓矧伊懷人而忘其東

東可遊矣會之丘矣于山于水于廟于寺于亭于里君
子遊焉予以宴喜其樂亶亶

粵東可居彼吳之墟有田有庭有朋有書有藁有魚君

子居焉惟以宴醑其樂徐徐

我朋在矣彼陸之子如松如杞淑問不已

我友于征彼鄭之子如琇如英德音孔明

我思震澤菱芡幕幕寤寐如覲

我思剡谿杉篠萋萋寤寐無迷

有鳥有鳥粵鷗與鷺浮湍戲渚皓然潔素忘其猜妬彼
何人斯曾足傷懼

此懼惟何懼寘于羅彼驕者子讒言孔多我聞先師體

命委和公伯之愬則如予何悵然山河惟以嘯歌其憂也哉

重陽陪元魯山登北城贈別

時元有挂冠之意

山縣遶古堞悠悠快登望
雨餘秋天高目盡無隱狀
綿連洩川迴杳渺鴉路深
彭澤興不淺臨風動歸心
賴茲琴堂暇傲睨傾菊酒
人知歲已登從政復何有
遠山十里碧一道銜長雲
青霞半落日混合疑晴曛
漸聞鶯栖羽坐歎清夜月
中歡愴有違行子念明發
僅能泯寵辱

未免傷別離
江湖不可忘
風雨勞相思
明時當盛才
短伎安所設
何日謝百里
從君漢之澁

蒙山作

東蒙鎮海沂
合沓餘百里
清秋淨氛靄
崖岨隱天起
于役勞往還
息徒暫攀騎
將窮絕迹處
偶得冥心理
雲氣雜虹霓
松聲亂風水
微明綠林際
杳窈丹洞裏
仙鳥時可聞
羽人邈難視
此焉多深邃
賢達昔所秘
子尚捐俗紛
季隨躡遐軌
蘊真道彌曠
懷古情未已
白鹿凡幾遊

黃精復奚似顧予尚牽纏家業重書史少學務從師壯
年貴趨仕方馳桂林譽未暇桃源美歲暮期再尋幽哉
羨門子

越江秋曙

扁舟東路遠曉月下江濱潏灩信潮上蒼茫孤嶼分林
聲寒動葉水氣曙連雲暎日浪中出榜歌天際聞伯鸞
常去國安道惜離羣延首剡谿近詠言懷數君

山莊月夜作

獻書嗟棄置疲拙歸田園且事計然策將符公冶言桑
榆清暮景雞犬應遙村蠶罷里閭晏麥秋田野喧澗聲
連枕簟峰勢入堦軒未奏東山伎先傾北海樽隴瓜香
早熟庭果落初繁更愜野人意農談朝竟昏

李華

華字遐叔趙郡人舉開元二十三年進士天寶二
年博學宏詞皆為科首天寶十一年拜監察御史
除右補闕祿山亂輦母而逃為盜所得二京復坐

謫杭州司功參軍召加司封員外郎將以司言處
之華曰馬有隳節辱志者可以荷君之寵乎移病
請告李峴領選江南表為從事以風痺廢居楚嘗
為元德秀墓碑顏真卿書李陽冰篆額時號三絕

古體詩

詠史

昂藏獬豸獸出自太平年亂代乃潛伏縱人為禍愆嘗
聞斷馬劍每壯朱雲賢身死名不滅寒風吹墓田精靈

如有在幽憤滿松煙

漢皇修雅樂乘輿臨太學三老與五更天王親割牲一人調風俗萬國和且平單于驟款塞武庫欲銷兵文物此朝盛君臣何穆清至今墮壇下如有簫韶聲

文侯耽鄭衛一聽一忘餐白雪燕姬舞朱絃趙女彈淫聲流不返惱蕩日無端獻歲受朝時鳴鐘讌百官兩牀陳管磬九奏殊未闌對此惟恐卧更能整衣冠

沂水春可涉泮宮映楊葉麗色異人間珊珊搖珮環展

禽恒獨處深巷生禾黍城上飛海雲城中暗春雨適來
鳴珮者復是誰家女泥沾珠綴履雨濕翠毛簪電影開
蓮臉雷聲飛蕙心自言沂水曲采萍兼采綠歸逕雖可
尋天陰光景促憐君貞且獨願許君家宿徒勞惜衾枕
子不顧雙娥艷質誠可重淫風如禮何

寄趙七侍御

有序

自餘干谿行經弋陽至上饒山川幽麗思與雲
卿同遊邈不可得因叙疇年之素寄懷於篇云

搖漿曙江流江清山復重心愜賞未足川迴失前峰凌
灘出極浦曠若天池通君陽青嵯峨開拆混元中九潭
魚龍窟仙成羽人宮陰奧潛鬼物精光動煙空玄猿啼
深籠白鳥戲葱蒙飛湍鳴金石激溜鼓雷風雨濯萬木
鮮霞照千山濃草間長餘綠花靜落幽紅渚煙見晨釣
山月聞夜舂覆谿窈窕波涵石淘溶溶丹丘忽聚散素
壁相奔衝白日破昏靄靈山出其東勢排昊蒼上氣壓
吳越雄迴頭望雲卿此恨發吾衷昔日蕭邵遊四人纔

成童屬詞慕孔門入仕希上公緯卿陷非罪折我昆吾
鋒茂挺獨先覺拔身渡京虹斯人謝明代百代墜鵷鴻
世故墜橫流與君哀路窮相顧無死節蒙恩逐殊封天
波洗其瑕朱衣備朝容一別凡十年豈期復相從餘生
得攜手遺此兩孱翁羣遷失鶯羽後凋惜長松衰旅難
重別悽悽滿心曾遇勝悲獨遊貪竒悵孤逢禽尚彼何
人胡為束樊籠吾師度門教投弁躡遐蹤

仙遊寺

有龍潭穴
弄玉祠

捨事入樵逕雲木深谷口萬壑移晦明千峰轉前後巖
然龍潭上石勢若奔走開拆秋天光崩騰夏雷吼靈谿
自茲去紆直互紛糾聽聲靜復喧望色無更有冥冥翠
微下高殿映杉柳滴滴洞穴中懸泉響相扣昔時秦王
女羽化年代久日暮松風來簫聲生左右早窺神仙錄
願結芝朮友安得羨門方青囊繫吾肘

春遊吟

初春遍芳甸千里藹盈矚美人摘新英步步翫春綠所

思杳何處宛在吳江曲
可憐不得共芳菲
日暮歸來淚滿衣

近體詩

長門怨

弱柳鴛鴦薦啼妝
翡翠衾鴉鳴秋殿曉
人靜禁門深每憶椒房寵
那堪永巷陰
自驚羅帶緩
非復舊來心

奉使朔方贈郭都護

絕塞臨光祿
孤營佐貳師
鐵衣三月冷
金鼓朔風悲
都

護徵兵日將軍破鹵時揚鞭玉關道回首望旌旗

春行寄興

宜陽城下草萋萋澗水東流復向西芳樹無人花自落
春山一路鳥空啼

于逖

逖天寶間詩人獨孤及李白皆有詩贈之

古體詩

野外作

老病無樂事歲秋悲更長窮郊日蕭索生意已蒼黃小
弟髮亦白兩男俱不强有才且未達況我非賢良幸以
朽鈍姿野外老風霜寒鴟噪晚景喬木思故鄉魏人宅
蓬池結網佇鱸魴水清魚不來歲暮空彷徨

憶舍弟

衰門少兄弟兄弟唯兩人饑寒各流浪感念傷我神夏
期秋未來安知無他因不怨別天長但願見爾身茫茫
天地間萬類各有親安知汝與我乖隔同胡秦何時對

形影情懣當共陳

張彪

彪蓋潁洛間靜者天寶末將母避亂杜子美嘗以
詩寄張十二山人彪云

古體詩

古別離

別離無遠近事歡情亦悲不聞車輪聲後會將何時去
日忘寄書來日乖前期縱知明當返一息千萬思

趙徵明

徵明詩見篋中集

古體詩

回軍跛者

既老又不全始得離邊城一枝假枯木步步向南行去
時日一百來時月一程常恐道路傍掩棄狐兔瑩所願
死鄉里到日不願生聞此哀怨詞念念不忍聽惜無異
人術倏忽具爾形

思歸

為別未幾日去日如三秋猶疑望可見日日上高樓惟
見分手處白蘋滿芳洲寸心寧死別不忍生離憂

賀蘭進明

進明開元十六年進士祿山亂以御史大夫為節
度守臨淮張巡乞師不應至德中為南海太守嶺
南節度使終員外郎

殷璠云員外所著述百餘篇頗究天人之際又有

古詩八十首大體符於阮公行路難五首並多新興

古體詩

行路難

君不見蠟下井百尺不及泉君不見山上苗數寸凌雲
煙人生相命亦如此何苦太息自憂煎但願親友長含
笑相逢莫乏杖頭錢寒夜邀歡須秉燭豈不長思花柳
年

君不見門前柳榮耀暫時蕭索久君不見陌上花狂風
吹去落誰家鄰家思婦見之歎蓬首不梳心歷亂盛年
夫婿長別離歲莫相逢色凋換

君不見芳樹枝春花落盡蜂不窺君不見梁上泥秋風
始高燕不棲蕩子從軍事征戰蛾眉嬋娟守空閨獨宿
自然堪下淚況復時聞烏夜啼

君不見雲中月暫盈還復缺君不見林下風聲遠意難
窮親故平生或聚散歡娛未盡樽酒空歎息青青陵上

栢歲寒能有幾人同

君不見東流水一去無窮已君不見西郊雲日夕空氛
氲羣雁徘徊不能去一雁驚鳴復失羣人生結交在終
始莫以升沈中路分

李嶷

嶷詩鮮潔有規矩其少年三首詞雖不多翩翩然
俠氣在目也

古體詩

淮南秋夜呈周侶

與侃同

天淨河漢高夜間砧杵發清秋忽如此離恨應難歇風
亂池上萍露光竹間月與君共遊處勿作他鄉別

近體詩

林園秋夜作

林卧避殘暑白雲長在天賞心既如此對酒非徒然月
色偏秋露竹聲兼夜泉涼風懷袖裏茲意與誰傳

少年行

十八羽林郎戎衣侍漢王臂鷹金殿側挾彈玉輿傍馳
道春風起陪遊出建章

侍獵長楊下承恩更射飛塵生馬影滅箭落雁行稀薄
暮隨天仗聯翩入瑣闈

玉劍膝邊橫金杯馬上傾朝遊茂陵道夜宿鳳凰城豪
吏多猜忌毋勞問姓名

芮挺章

挺章天寶進士常依祕書監陳公國子司業蘓公

編國秀集三卷

近體詩

江南弄

春江可憐事最在美人家
鸚鵡能言鳥芙蓉巧笑花
地銜金作埒水抱玉為沙
薄晚青絲騎長鞭赴狹斜

少年行

任氣稱張放銜恩在少年
玉階朝就日金屋夜昇天
軒騎青雲際笙歌綠水邊
建章明月好留醉伴風煙



御定全唐詩錄卷十八